

aliqua ex parte superius tendisse ex vomitu rejectis non sine stupore notarunt æger & chirurgus, mihi que paulo post advenienti monstrarunt. Sed citra liquoris nostri additionem non absimile quid à clysmate injecto factum medici clarissimi memoriæ mandarunt, inter illos autem præprimis Clariss. Th. Kerkringius, cujus egregia in Spicilegio suo anatomico Observatio trigesima prima, veritatis adstruit *μαρτυρίαν* Jam si liquida mole sua ascendere queant & valvulæ limites transgredi: quid dubitabimus in fumum resoluta inflationis adminiculo subtilitate & levitate atomorum suorum facilis posse petere eandem viam & quidem minori negotio? Huc usque igitur (ut ad propositum redeam) in praxi pervenere nostræ machinæ experimenta, cujus funiculi aut fumiductus conficiendi rationem hæctenus experiri haud potui, cum datâ licet operâ neminem offenderim coriarium in florentissimâ nostrâ urbe, qui canaliculum ejusmodi flexilẽ seu fumiductũ ex corio parare sciverit Anglicano similem, quamvis in superioribus Germaniæ locis parari audiverim tales, quales ex Angliâ quondam accepi. Curabo itaque in posterum aliunde adferri funiculos, donec in nostris locis parari queant, quibus accommodari potest pyxis nostræ inventionis, loco eboris ex solido ligno conficienda & interius lamina ferrea custodienda ne rumpatur: Inferiori parti cannula in anum immittenda facili negotio adjungitur, transversim tamen pro commodiori ingressu & liberiori fumi exitu. Itaque sine magno sumptu haberi poterit machina cunctis fere